

Atia ta desea continuidad di gobierno y di Dialogo Social

ORANJESTAD (AAN) -- Señor Ronny van Trigt, presidente di ATIA, a expresa su satisfaccion cu e forma con e proceso di eleccion a bay, na un manera civico sin ningun incidente pa lamenta.

Rapportnan cu ATIA a haya ta indica cu tur cos a bay segun regla y na orden.

El a subraya cu e proceso democratico a bay hopi bon y naturalmente mester felicita na tur esnan cu a participa den dje y cu a yuda cu esaki a bay manera mester ta.

El a haci enfasis cu pueblo a dicidi y e partido cu tabata na gobierno ta sigui na mando y e partido mas grandi di oposicion ta sigui como tal. ATIA como organizacion, naturalmente ta hopi ansioso pa comparti ideanan cu e gobierno cu lo bay forma den e proximo luna.

E continuidad di gobierno y di e dialogonan social ta un plataforma cu ATIA sin duda ta desea di mantene, señor van Trigt a indica.

El a señala cu paisnan grandi manera Hulanda, Inglatera, entre otronan tin nan Dialogo Social, y esaki ta algo cu den un democracia hopi avanza nan no por imagina nan sin dje.

Den e caso di Aruba, Dialogo Social ta un proceso relativamente corto y e no ta perfecto. Esnan envolvi lo purba mehora e proceso aki, pasobra ta cumbini e plataforma pa continuamente traha riba mehoracion, pero nan mester sinti hopi orguyoso di locual a wordo haci caba.

Señor van Trigt a indica cu tin biaha tin critica riba e proceso aki, pero e ta kere u e ta un proceso esencial pasobra tin otro formanan di goberna tambe, por ehemplo un gobierno cu ta tuma su decisionnan completamente riba su mes, y comunica esey na e poblacion ora e ta haya esey necesario.

Pero den e caso di e gober-

nacion aki ta diferente y sikiera e gremionan tin algo di bisa y trece dilanti e vision di nan miembronan y locual nan ta para pe.

El a señala cu e impresion pa e partidonan di oposicion por ey cu e gremionan ta bay mucho na amen di gobierno, pero ora nan ta sinta den e dialogo nan sa cu ta dialogonan serio ta tumando lugar, y hopi di e asuntonan cu a wordo trata a wordo studia extensamente, y a wordo discuti riba nan fuertemente.

Ora nan no ta sinta na mesa cu otro ta facil pa sali bay critica, Presidente di ATIA a expresa, pero esey ta haci daño na e proceso tambe, mientras cu den un dialogo cada partner ta trece nan puntonan dilanti y tin biaha e ta wordo confundi y kere cu loke nan a trece dilanti mester wordo acepta.

El a subraya cu esey no ta dialogo. Den dialogo de vez en cuando nan puntonan ta wordo acepta y nan ta haya loke nan ta desea pero tambe de vez en cuando no ta asina.

Den Dialogo tambe gobierno tin su agenda, tin su punto di bista y den e agenda aki e gremionan mester tene nan mes na dje tambe, pasobra nan no ta determina ni elegi e gobierno, pero gobierno ta haci esaki y na final Parlamento tin cu aproba tur e ideanan di gobierno, y e gremionan ta solamente un partner cu ta scucha, purba di trece tur nan puntonan di bista dilanti pa asina yuda mehora e sistema.

Ronny van Trigt presidente di ATIA ta hopi contento pa e desaroyo civico di e proceso di eleccion cu a bai sin ningun disturbio, tur cos na ordo y riba regla.

El a felicita na tur esnan cu a participa den e proceso democratico aki, cu a logra pa cosnan bai manera nan a bai. Pueblo a dicidi pa e gobierno cu tabata na mando continua su trabao y pa e partido mas grandi den oposicion sigui e partido mas grandi den oposicion y como organizacion ATIA ta ansioso pa comparti di idea cu e gobierno cu ta bai forma aki un luna.

El a splica cu e continuacion di gobernacion y e continuacion di dialogo social ta un plataforma cu ATIA ta sostiene, y esaki ta existi den paisnan grandi manera Hulanda y otronan, cu den un democracia avanza nan no por ni imagina nan mes sin esey. Na Aruba e dialogo social ta relativamente nobo y tin espacio pa mehoracion locual nan ta bai sigui haci, pero di loke a logra caba,

ATIA ta sinti hopi orguyoso.

Ela bisa cu tin otro forma pa goberna, p.e cu e gobierno ta tuma decision completamente su so y ta notifica e pueblo ora e ta haya ta necesario.

Den e caso di e gobierno aki ta diferente, caminda e gremionan por trece nan opinion dilanti y e vision di nan miembronan y kiko nan ta para pe.

Partidonan di oposicion ta critica e gremionan cu ta den dialogo social y ta bisa cu nan a permiti gobierno tuma decisionnan cu no ta bon y cu nan ta mucho complaciente cu gobierno. Van Trigt a splica cu nan por tin e impresion ey, pero sinta den dialogo nan tin discusionnan hopi serio y tur punto ta ser studia ampliamente, y riba algun punto a discuti fuertemente.